

ALL THINGS PRAISE THEE

Peub a'th wormel, Arludh splann,
Tir ha mor ha nev a-vann;
Peub a veu dhe'th lawa gwryz
Ha dhe'th roweth war an byz
May hwrons gordhyans dhizo jy;
Peub a'th wormel: Duw, gwren ni.

Peub a'th wormel, nos dhe nos
Golow ster yw kan heb tros;
Peub a'th wormel; gwres an jydh
Kan dhe'th allos sy a vydh;
Termyn, spas a'th wormel jy;
Peub a'th wormel: Duw, gwren ni.

Peub a'th wormel; lies son
Oll kemmyskys, deg mil ton,
Keur heb hedhi d'worth an nor,
Hwyflans gwyns, faborden mor,
Rustla del, a wenan, si;
Peub a'th wormel: Duw, gwren ni.

Peub a wormel agan Duw;
Glaw ha gluth, kammneves liw,
Kommol gwlan, howlsedhes rudh,
Tewedh krev ha gover hudh;
Havas, gwavas dhizo jy
A wra gordhyans: Duw, gwren ni.

Peub a'th wormel: Duw a ras,
Ger gallozek, Gwrier bras,
Spyrys kevys yn pub le,
Gwren omblegya orth dha se,
Sevel kolonn troha ty;
Peub a'th wormel: Duw, gwren ni.

- English words by George Conder, 1874.
- Translated into Cornish by Ken George, 1989 Feb.
- Tune: Te laudant omnia.